





1614 8

LETTRE DE  
MONSEIGNEVR LE  
PRINCE,

A LA ROYNE

8

1614

Case

F

39

.326

1617 cunn 2

THE NEWBERG  
LIBRARY

**M**ADAME,

Toute mon affection a esté tousiours le seruice du Roy; & bien de cest estat. Je l'ay tesmoigné du viuant du feu Roy par mon absence necessitée (& depuis sa mort) par mon prompt retour prest de sa Majesté, cellant les desplaisirs que i'ay receus des desordres que l'on a veus assez frequents pour empescher les mouuemens desquels eust peu naistre la guerre que i'ay estimée si dangereuse & nuisible à la minorité du Roy, Monseigneur: que i'ay creu tous autres maux plus tolerables. Si bien que par la grace de Dieu, vostre bonté; & ma patience, nous sommes en la quatriesme année de la minorité du Roy, dans laquelle nous recognoissons l'accroissement de si grandes confusions & pernicieux desordres, que vostre susdicte bonté & nostre patience ne seroit assez forte pour empescher le bouleuersemēt & la ruine de cest estat: prolongée iusques icy par des foibles & honteux remedes, s'il n'estoit vertueusement & prudemment pourueu par l'aduis de plusieurs Princes, Seigneurs Ecclesiastiques, Officiers de la Couronne, & cours Souueraines.

Nous supplions treshumblement vostre Majesté d'y pouruoir de remedes salutaires, à l'acquit du deuoir à quoy & vous, & nous sommes obligez, à Dieu, au Roy, & à la France. Supplication tres-iuste que nous eussions faite nous mesmes deuant vostre Majesté, n'eust esté que nous la voyons entournée & préoccupée de peu de gens qui veulent regner dedans la confusion, seuls cause de nostre depart, & non vostre Majesté, de laquelle scauons les



Pouïables intentions de tant plus remarquables que la verité vous a esté celée par ceux qui n'ont iustification que d'auoir maintenu vn peu de repos. Dans lequel ils nous ont tramé vn continuel traual par les confusions & prodigalitez, ventes d'honneurs & de reputation, ou ils ont prostitué tous les ordres de ce Royaume, duquel ils auoient mesuré la durée de leur vie, sans se soucier de ce qui aduiendroit apres. Repos non prouenu de leur conduicte, ains des bons François, qui amateurs de paix ont souffert toutes maluersations, afflictions & charges, plustost que de susciter aucun trouble, non que tous ne vissent qu'ils circonuenoient vostre Majesté: partisans l'administration de ce florissant Estat entre petit nombre de personnes ayans pour tesmoins de leur foiblesse la perte de la reputation de la France es pays estrangers, & leurs desseins cachez qui en ce grand Estat qui ne souloit rien craindre, deuoiēt estre sceus & ouuerts, du moins aux Princes & Officiers de la Courōne, interessez en l'Estat, lesquels ils n'ont rendus participans des affaires qu'autant qu'il leur sembloit necessaire, pour auctoriser leurs deliberations, apportans leurs resolutions de leurs logis au Cabinet, & n'en faisans iamais conclure vne seule en vostre presence à la pluralité des voix. Mais les courrans du maintien de l'auctorité de vostre Majesté, du Cabinet de laquelle ils fortoiēt pour en dire leurs arrests aux Princes, n'ayās receu leurs aduis que par maniere d'acquict, tendans à susciter des enuies & diuisions entr'eux, fauorisans les vns & reculans les autres, faisans deux parties pour en auoir l'vne à leur deuotion. Artifices esprouuez si

deſaſtreux aux François, recommencez ſoudain apres le deceds du Roy, que Dieu abſolue, rejetans les ſalutaires aduis de feu Monſieur de Mayenne, qu'il n'eſtoit iuſte de profiter ou rançonner la minorité de noſtre ieune Roy, qu'il ne falloir rien demander & ſervir ainſi que nous eſtions obligez naturellement: Mais au contraire, intereſſant pluſieurs particuliers pour les avoir à leur deuotion. Ils ieterent l'Eſtat en des hazards tres dangereux, contre toutes formes vſitées aux minoritez des Roys, eſquelles ont eſtez touſiours aſſemblez les Eſtats generaux ſi neceſſaires que les Roys les ont conuoquez en leurs majoritez pour beaucoup moindres deſordres que ceux d'a preſent. Pleuſt à Dieu (Madame) qu'il m'eut couſté partie de mon ſang, & que les euſſiez aſſemblez incontinent apres le deceds du Roy, vous fuſſiez en plus; ou auſſi iuſte autorité au gré de l'Egliſe, de la Nobleſſe, & du Tiers Eſtat, la France n'eut perdu ce genereux nom d'Arbitre de la Chreſtienté, acquis ſi glorieuſement par le deſſunct Roy. Tiltre qui tenoit la balance des deux grandes factions de l'Europe, protegeant la tranquillité publique: & ceſte perte eſt d'autant plus grande & deplorable, qu'il ſemble que nous ſoyons ſortis du chemin que le feu Roy nous avoit tracé. On n'eut pas razé la Citadelle de Bourg cōtre l'aduis des Princes & Officiers de la Couronne, meſme de monſieur le Conneſtable. On n'eut pas donné quatre cens mil liures, tant pour le razement que pour la recompenſe d'icelle. On n'eut pas precipité le mariage du Roy, de Meſdames ſes ſœurs, avant que la loy de Dieu, & tous les Ordres, la ma-

iorité du Roy approchant l'eussent approuué. Ces mariages eussent declarez au public, non par la lecture d'un escript contenant les raisons qu'on auoit eues de le haster : mais en demandant aduis s'ils estoient utiles à faire : Les Parlemens n'eussent esté empeschez en la libre fonction de leurs charges. Les Gouverneurs des Prouinces & places importantes n'eussent esté données aux personnes indignes & incapables. On eust tasché à reünir les Ecclesiastiques & la Sorbonne, non à les diuiser & opprimer par vaines disputes inutiles en ce temps. L'auctorité des Prelats & Ecclesiastiques n'eust esté violée, ains maintenüe en son entier. On n'eust donné aucune charge, ny par faueur, ny par argent, l'aduis en eust esté demandé aux Princes & Officiers de la Couronne, pour par vostre Majesté estre après conféré à gens capables. Les Ambassadeurs n'eussent esté choisis que par le mesme aduis, leurs inclinations n'eussent esté incogneuës à tous ceux qui ont interest au bien de l'Estat : Nulle despesche n'eust esté receüe, sans estre veüe & leüe en presence des dessusdits ; On n'eust point souffert les entreprises faictes sur la Nauarre, & le Mont-ferrat, ny empesché le renouvellement de la Ligue entre les Venissiens, & les Grisons tant approuée & désirée par le feu Roy, On n'eust rompu le mariage projecté par le feu Roy avec Monsieur de Sauoye, sans meure deliberation ; & pour vne entiere obseruation des Edits de ceux de la Religion pretendüe refformée on leur eust osté tout subiect de plainte ; On eust reprimé ceux d'entr'eux, qui eussent passé les limites de leur deuoir, on n'eust semé entr'eux des diuisions, qui leur faisant songer à leur particulier,



ont failly a iecter le public & l'estat en peril , on n'eust donné trois cens mil liures pour l'achapt d'Amboise, payant de l'argent du Roy les places de sa Majesté, on eust retranché tant de dons immenses à personnes indignes, le peu de personnes ne se feust attribué les principales dignitez de l'Estat, sans l'aduis d'aucun Prince, ny des Officiers susdicts : Les Estats ou le Conseil vous eussent releuez de tant d'importunitez, se chargeant de l'enue, & vous de benedictions.

Vostre Majesté considerera, s'il luy plaist, les desordres susdits ; & les suiuan, & par iceux iugera la necessité d'assembler les Estats generaux leurs & libres, le chastiment des meschans, & la recompence des bons (soustien des Monarchies bien ordonnées) estant peruertis, donnent assez à cognoistre le danger de ce Royauine. Tous les offices de iudicature ; & des finances sont montez à prix excessifs, il ne reste plus de récompence pour la vertu. Puisque la faueur, l'alliance, la parenté & l'argent ont tout pouuoir, & que les finances sont de telle façon profuses, que les cent mil pistolles ne coustent rien, mesmes sont employées en choses de neant, à gens qui s'enrichissent sans trauail du sang du peuple, Les plaintes, clameurs & larmes des trois Estats, couuent en leur cœur vn feu caché, l'Eglise n'a plus sa splendeur : nul Ecclesiastique n'est plus employé aux ambassades ; & n'a plus son rang au Conseil, les beneficiers sont surchargez de vexations & charges iniustes, la Nobesse est appauurie & ruynée par tailles & impositions du sel ; par commissions extraordinaires pour auoir de l'argent, toutes leurs

denrées sont doanées, tous leurs tiltres sont recherchés bien que perdus & bruslez; la Noblesse souffrit de la France, terreur des estrangers, maistresse de la campagne & vaincresse des batailles, qui reſtablit les Sceptres, & releue les Couronnes, est maintenant taillée, bannie des offices de iudicature & finances, faute d'argent, leur vie & leurs biens en puissance d'autrui priuée de la paye des hommes d'armes & archers anciennement entretenus, & maintenant esclaves de leurs creanciers, le peuple lamente les charges qu'on trouuera redoublées par vne quantité de commissions extrardinaires depuis la mort du feu Roy: Il faut que tout tombe sur les pauvres, pour les gages des riches: Les Princes & Officiers de la Couronne, ausquels le feu Roy auoit toute fiance, ont esté esloignez, & maltraitez. On merend presque par les discours qui courent, & tous les Princes & officiers de la Couronne qui me font l'honneur de conuenir avec moy, en mesme aduis, comme perturbateurs du repos public. On tient Conseil d'arrester les Princes & officiers de la Couronne, bien que sans crime ce qui paroist auoir esté deliberé contre la personne de Monsieur de Bouillon, & le refusait à Monsieur de Longueuille d'aller exercer sa charge en son gouuernement, monstre assez la continuation de leur violence, & ce qui a esté executé en la personne de Monsieur de Vendosme, lequel sans considerer ce qu'il est au Roy, l'amitié particuliere, que le feu Roy luy portoit, non accusé, exempt de tous crimes, sans aucune forme de Iustice, sans aduis d'aucun grand de ce Royaume, on a retenu prisonnier: Cela est in-

visité en France, singulierement, durant la minorité du Roy, ce que nous croyons n'auoir esté faict par aucun mauuais naturel de vostre Majesté, ny desir de faire iniustice: cest pourquoy, nous supplions tres-humblement vouloir le faire deliurer, afin qu'é continuant à bien seruir le Roy & l'Estat, il luy monstre par bons effects, cōme il a fait, iusques icy n'auoir eu iamais aucune mauuaise intention contre son seruice: On veut persuader à vostre Majesté de s'armer, on prend pour pretexte nostre absence.

Considerez, Madame, que nous procedons par tres-humbles requestes, supplications & remontrances, & non à main armée, & quelles maledictions la France donnera à ceux qui troublans le repos de cet Estat & tranquillité, acquise par la vertu du feu Roy, mettront les premiers les armes à la main: Toute la France ne respire que la paix, & vne paisible & iuste refformation de cet Estat vous, sera-il donc dict (Madame) que les mauuais Conseils qu'on vous donne, vous portent à emprisonner les presens & a armer contre les absens, qui procurent vne saincte refformation, & sont si fidelles seruiteurs du Roy, de vous & de l'Estat, vous donnant par ce moyen vn si ample subiect de gloire.

Considerez ma lettre (Madame) & vous ny trouuez rien de nos interestz particuliers, ny à nos intentions presentes ny à l'aduenir: vous ne pouuez trouuer mauuais, si plusieurs vous supplient d'une mesme chose, & tous le desirent: Obligez par leur deuoir, & par l'amitié qu'ils ont contractée par vostre commadement pour pouruoir à tous les ac-



• cidents cy dessus representez.

• Je supplie tres-humblement vostre Majesté, de l'aduis de plusieurs Princes, Ducs, Pairs & Officiers de la Couronne, Cours Souueraines, Ecclesiastiques, & autres Seigneurs, tant presans qu'absens, qui ont veu & approuué la presente supplicatio, d'accorder l'assemblée des Estats generaux libres & seurs d'astrois mois au plus tard: & ce pendant retenir toutes les choses en estat pacifique, protestant de nostre part, que nous n'auons desir que pour la conservation de la paix & bien de cet Estat, & que nous n'attenterons au contraire, si par vne precipitée resolution de nos ennemis, qui se couurent du manteau de l'Estat sous vostre auctorité, nous ne sommes prouocquez a repousser leurs injures faites au Roy, & a l'Estat, par vne naturelle, iuste & necessaire deffence.

• Supplications tres-humble, que ie fais en qualité de premier Prince du sang, en l'Estat que ie suis, & sans armes, non ainsi que ceux qui pour profiter de telles assemblées faisoient des villes, armoyent le peuple, & des estrangers, & faisoient guerre & paix a leur profit pour vne lieutenance generale, gouuernement des Prouinces & des places, puis aydoient a eluder l'assemblée, sans se soucier de la reformatio publique.

• Nous supplions aussi treshumblement vostre Majesté suspendre l'execution du mariage tant du Roy, que de Meisdames ses Sœurs, iusques a l'assemblee desdits Estats; Et pour monstrier que nostre particulier n'a nul pouuoir sur nous, Nous remettons au Roy en l'assemblee desdits Estats libres & seurs si



la necessité de ses affaires le requiert toutes nopensions & gratifications contre les calomnies de ceux qui nous accusent qu'il n'y alloit que de nostre particulier, que nous preferons au public, Médicace de ceux qu'on dit aymer mieux mettre le feu au milieu de ce Royaume, que de voir leur autorité esteinte, Autorité pernicieuse qui sera renuersee par nostre iuste & bon Roy. Auquel nous supplions tres-humblement vostre Maiesté vouloir faire donner bonne instruction, & de luy oster les cōseils de toute partialitez qui luy sont donnez contre ceux qui ont l'honneur d'estre ses plus proches suiets & seruiteurs, & pour son contentement r'appeler le Cheualier de Vandosme tenir pres de sa Maiesté pour le soin de sa santé personne vie de religion & probité requise & cogneüe.

Nous supplions aussi vostre Maiesté vouloir pouruoir aux gouuerneurs des frontieres de deniers suffisans pour vacquer à la conseruation des places qu'ils ont en garde, Nous recognoissons nostre Roy nous estre donné de Dieu, nous sçauons l'obeissance que nous luy deuons, & n'y manquerons d'un seul point, Nous esperons aussi que tous les Princes & officiers de la Couronne, Cours souueraines Ecclesiastiques & Seigneurs qui sont prests de vostre Maiesté se iointront à nostre mesme desir, & auront tous ensemble preparé à vostre Maiesté, le chemin, l'honneur, & la gloire d'auoir restabli tous les ordres de ce Royaume en leur premiere splendeur & liberté, reformé ce Royaume & rassuré leur repos avec autant de los que si vous en auiez acquis vn autre; Respondans genereusement à ceux qui di-

sent les Estats diminuer l'autorité du Roy; que vous l'aurez r'affermy & rendu perdurable, Nous vous voulons servir & assister ausdits Estats ainsi qu'il sera recogneu vtile au seruice du Roy à la France, & à la conseruation de l'autorité Royale, & de celle de vostre Maiesté estans ses treshumbles seruiteurs, & en particulier ie la supplie tres-humblement de croire que ie suis

MADAME,

Vostre tres-humble & tres-obeyssant seruiteur & subiet HENRY  
DE BOVRBON.

De Mesieres le 18.

Februarie, 1614.

*Lettre de Monsieur le Prince, au Parlement de Paris, presentee par le sieur de Fiesbrum, le*

*22. Feurier 1614,*

Messieurs ie sçay que l'on preuiendra mes iustes intentions de beaucoup de calomnies & faux bruits to<sup>r</sup> cōtraires (ie m'asseure) à l'opiniō que vous en prendrez commem'ayāt aussi practiqué & recogneu que craignant d'alterer quelque chose par mes resolutions que i'ay euës au seruice du Roy & bien de l'estat, i'ay retenu mes iustes ressentimens & les ay comme enseuelis par ma patience: Mais encores vous en veux ie mieux esclarcir, & rendre comme compte de mes actions, à vous di-je que ie reconnois estre la principale tutrice de cest estat. C'est

pourquey ie vo' enuoye la coppie de lettrea que i' es-  
crits a la Royne, par ou i' expose entierement les  
saintes affections qui m'ont meu à me retirer de  
la Cour pour nē cōmūiquer ny adherer aux abus  
qui si commettent par ceux qui manient & dispo-  
sent des affaires du Roy & del'estat, en demandant  
la reformation avec tres - iuste supplication à la  
Royne, luy en proposant le remede & requerant cō-  
me premier Prince du sang suiet du Roy, & qui a le  
principal interest au bien du seruice de sa Maiesté.  
N'ayant pour toutes armes que mes tres-humbles  
prieres à sa Maiesté, comme vous le verrez par  
la coppie que ie vous enuoye, vous supliant hum-  
blement, Messieurs de nous assister de vos conseils  
& autoritez en vne si loüable & raisonnable entre-  
prise, comme les plus cōsiderables au seruice du Roy  
& reformation de l'Estat, Ce faisant vous vous ac-  
quicterez du deu de vos charges & acquerrez gloi-  
re & reputation, demeurant

Messieurs,

Vostre tres-humble & tres affe-  
ctionné seruiteur.



*Lettre de monsieur le Prince, à monsieur  
le Prince de Comty.*

**M**ONSIEUR, Je ne scaurois assez regretter, que vostre santé soit vn iuste empeschement à ne vous voir selon vostre courage affectionné au seruice du Roy, par vostre Prince, à ce qui est de nos Scincères intentions, dont par l'enuoy de ce Gentil-homme & coppie de la lettre que i'escris à la Royné. Vous cognoistrez la verité. Je vous supplie donc (comme estant du sang Royal) comme proche du Roy, interessé à l'Estat, & mon seul oncle seconder, ou vostre indisposition vous retient, nos iustes dessains, tendant sans armes à la reformation de l'Estat. Surquoyl'on arme non pour sauuer l'Estat: Mais pour conseruer l'ambition de ceux qui sont causes de ses desordres. Aydez aussi, ie vous supplie par vostre courageuse intercession, à la deliurance de Monsieur de Vandosme, & à la correction des desordres, par vne assemblée d'Estat, Que ie requiers à la Maiesté. A quoy ie vous supplie vous ioindre, Vous suppliant me tenir à iamais.

Monsieur,

Vostre bien-humble Nepueu & seruiteur,  
HENRY DE BOVRBON.

de Mezieres ce      Feburier 1614.



*Lettre de Monsieur de Nevers à la Roynne.*

**M**ADAME,  
M'ay desia donné aduis à vostre Maïesté de la  
rebellion qui auoit esté faicte contre l'autorité du  
Roy, par ceux de la Citadelle de ceste ville: Main-  
renant ie luy donne celuy de l'obeyssance que ie  
luy ay faict rendre estans sortis & me l'ayant remi-  
se entre les mains: A la seureté de laquelle j'ay  
pourueu, pour y estre vostre Maïesté obey, ainsi  
qu'elle le peut esperer de moy, estimant qu'elle  
mettra en consideration la desobeyssance qui m'a  
esté réduë par le Marquis de la Vieuille, en la char-  
ge qu'il a pleu au Roy me donner en ceste Prouin-  
ce. Cest exemple pouuant tirer vne consequence  
commune, & generale à tous les Gouverneurs de  
ce Royaume. Je supplie tres-humblement vostre  
Maïesté, Madame, en vouloir commander la Ju-  
stice telle que vous l'estimerez necessaire pour gar-  
der l'autorité du Roy, & en laquelle ie puisse trou-  
uer le contentement que vostre Maïesté mesme iu-  
géra raisonnable, veu que ceste ville est sous ma  
charge, & à moy qui rend mon ressentiment d'au-  
tant plus considerable: A quoy ie supplie vostre  
Maïesté d'auoir esgard, & de croire que ie suis,

Vostre tres-humble & tres-obeyssant seruiteur  
& subiect, NEVERS.  
De Mezieres, ce 19. Feurier, 1614.

Delivered to the  
Office of the  
Director of the  
Bureau of  
Prisons  
at the  
Department of  
Justice  
Washington, D.C.  
May 10, 1910



